



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakngma :

f Tir Yimym

ig tiryimym@aolima

yt tir yimym

TAPAK 8

**Centre-i Myanmar den arrtsü
atsübangtsü: Amit Shah**

**Raiza Dhillon-i India atema
quota 18buba nguogo**



VOL. XXI NO. 98 (ADOK 98) DIMAPUR AMUNGNÜ (SUNDAY) ANJETI (JANUARY) 21, 2024 ₹ 5.00

One Nation, One Election atema küm 15 shia Rs 10,000 crore endoktsü

New Delhi, January 20, 2024 (Agencies): Lok Sabha aser state assembly tem election kasa mapang nung dang agira Election Commission-i küm 15 shia Electronic Voting Machines (EVMs) tasen alitsü ateam Rs 10,000 crore nungdaksü.

EVMs indang shelf life ya küm 15 lir aser election kasa mapang nung dang agira machine set ka election asem nung amshitetsü ta Election Commission-i Centre sorkar dangi shidi ka nung ashi.

Taküm Lok Sabha election atema India nung polling stations lakh 11.8 shi lapoktsüsa akümtsü. Election kasa mapang nung dang agira pollins station shia nung EVMs set anana nungdaksü- ka Lok Sabha election aser ka assembly constituency atema ta ECI-i ashi.

Maneni Control Units (CUs), Ballot Units (BUs) aser Voter-Verifiable Paper Audit Trail (VVPAT) machines talila ayutsüsa akümer kechiyong

election anogo dena mapang balala nung machine tamajungtem melentsüsa akümer ta ECI-isa metetdaksüogo.

EVM ka nung BU ka, CU ka aser VVPAT machine ka alir.

2023 tejaklen EVM ka indang jengangi- BU ka nung Rs 7,900, CU ka nung Rs 9,800 aser VVPAT ka nung Rs 16,000 liasü.

Centre sorkari taoba Tir Ram Nath Kovind lenisüba kübok linük nung kasa mapang nung elections agitsü atema asadangtsü luden ka tenteta lir.

High Level Committee on One Nation, One Election nem Lok Sabha, state assemblies, municipalities aser panchayats election kasa mapang nung dang agitsü atema asadangtsü aser tebilemba shidangtsü mapa lezmükja lir.

Law Ministry ajanga mapang kasa nung elections agitsü dak sendakba questionnaire ka agütsüba atema Election Commission-i iba telangzüba agütsü.

NDPP-i MP Tokheho Yepthomi olen jangjashitsür

Dimapur, January 20, 2024 (TYO): Member of Parliament (Lok Sabha) Tokheho Yepthomi-i Chummukedima nung sentong ka nung India sorkari Arrla 371(A) agiendaktsünür ta jembiba olen atema Nationalist Democratic Progressive Party (NDPP)-i jangjashitsüba osang ka metetdaksüogo.

Lok Sabha MP Tokheho-i jembiba onükji Party mesüra lennirtem tebilemba masü ta

NDPP Media & Communication Committee sangdong ka nung ashi.

Indo-Naga yimten latetsü atema tongtipang mapang ka nung Arrla 371(A) mementsüla saka tashitaitba kümdaktsütsüla, ta NDPP-isa ashi.

NDPP-isa sendaktep alir ajak külemi longjemtsü aser asen nübör tarutsü atema temeten aser maongkatem kümzuka ayutsüla ta parnokisa metetdaksü.

NBSE-i Centre Superintendents den senden amentsü

Dimapur, January 20, 2024 (DIPR): Nagaland Board of School Education (NBSE)-i HSLC aser HSSLC Examinations 2024 indang Centre Superintendents den senden ka amentsü ayongogo.

Iba senden ya February 1, 2024 nikongdang 1:00 ako nung

amentsü aser Examinations dak sendakba onüktem lemsateptsü ta NBSE-i metetdaksü.

Iba senden nung Centre Superintendents ajak adentsü mepishir aser Online ajanga agitsü anungji Centre Superintendents 2024 Whatsapp group nung link yoktsü ta NBSE-isa ashi.

Global Aviation Summit nung Nagaland nungia adener

Dimapur, Aenjeti/January 20 (TYO): Nagaland nungi Additional Secretary to the Government of Nagaland, Air Cell, Sentiwapang Aier-i anir ketdangsur aseme Asia nung civil aviation (commercial, general aser business aviation) tulutiba, Global Aviation Summit, Wing's India nung dentagi, koba Hyderabad nung January 18 nü nungi tenzuka January 21, 2024 tashi agitsü.

Parnoki Ministry of Civil Aviation nungi ketdangsurtem aser aviation sector nung service operators tem ajurua liasü.

Parnoki state nung aviation sector tejakleni terenlok nung bener aotsü asoshi sensaksema liasü.

Nagaland nungi ketdangsur asem nungya OSD Transport, Air Cell, M. Ababe Ezung aser Dy. GM NST, Nungshilemba na dena lir.

Raj Bhavan, Kohima nung state 3 indang Foundation Day among



January 20, 2024 nü Raj Bhavan, Kohima nung Manipur, Meghalaya aser Tripura State Foundation Days amongdang agiba noksa angur.

Kohima, January 20, 2024 (PRO Raj Bhavan): Manipur, Meghalaya aser Tripura state tem Foundation day anogo ka jelia mongogo. January 20, 2024 nü Dr. Imkongliba Ao Hall, Raj Bhavan Kohima nung iba benjung among.

State asemprong North eastern Region (Reorganisation) Act, 1971 kübok January 21, 1972 nü full-fledged states akum.

Iba sentong nung Nagaland Governor La Ganesan aden aser pai 'Ek Bharat Shreshtha Bharat' initiative nung aliba ama linük tangatetba asoshi tenüngsang agütsü.

Iba sentong ajanga state aser UT tem sobaliba, inyaksangshi aser maparen meteta akümer aser state balala tsungda

tangatetep aser tesentaktep akangshia India telongiem tashi itshir, ta Governor Ganesan-i ashi.

Linük nung sobaliba aika memeteti aliba metetsü aser linük nung nisung temeyoktep aliba akhümsüba iba sentong agir.

"Asenoki state asem indang Foundation Days bejungteptsü adenshiba ajanga parnok putiotsütem aser ajangzükbatem tushiba dang masü saka Northeast nung nübortem longjemtsü aser ka akümtsü tangatetba ajungketer" ta Ganesan-isa ashi.

Iba sabang ajanga Manipur, Meghalaya aser Tripura indang sobaliba, ken, tsüngsang aser art forms atema tenüngsang agütsür aser angazüker, ta paisa shisem.

Iba sentong nung Manipur state tenüng nung Library & Information officer NEILIT Nanda Singh aser Meghalaya tenüng nung Khasi Christian Fellowship, Kohima Chairman Emlin Kharkongor nati o jembiba.

Sentong nungsa Mao Cultural Song (Lochu Lo), Poumai Cultural Dance (Dao astsü maisii peide pei va-a hrii-e, Forefather lived as Head hunter), Maram Cultural Item (Kangraliimai), Paite Cultural dance, Manipuri Martial Arts (Thang -Ta) aser Khasi Cultural presentation (Pye Neh La Riti & Ka Song Kwai) shilemtem agia liasü.

Iba sentong nung Section Officer Raj Bhavan Jochule-i tesentepertem pelaa agizük aser Sr. Accountant Raj Bhavan Banuo Koza-i anküp tepela o jembiba.

NBSE-i HSLC & HSSLC tatidang osang metetdaksür

Dimapur, January 20, 2024 (TYO): Honibarnü Nagaland Board of School Education (NBSE)-i HSLC aser HSSLC Examinations 2024 agitsüba anogotem metetdaksüogo.

February 13 nungi February 23 tashi HSLC Examination 2024 agitsü aser February 12 nungi March 6 tashi HSSLC Examination 2024 agitsü.

HSSLC Examination nung kaketshir ajak agi 17,911 lir. Kaketshirtemji Arts - 14,167, Commerce - 949 aser Science 2,521 lir.

HSSLC Examination ya examination centres 68 nung agitsü aser compartmental examination centres 20 nung kaketshir 274 compartmental category kübok tatidang agütsütsü.

HSLC Examination 2024 nung kaketshir 22,136 lir aser

parnok rongnungi kaketshir 449 HSLC Compartmental Examination 2024 agütsütsü.

NBSE-isa February 12 nungi March 6 tashi Class XI Promotion Examination 2024 agitsü osang metetdaksüogo. Kaketshir 20,166-i Class XI Promotion Examination 2024 agütsütsü.

HSLC aser HSSLC Examinations 2024 atema question papers design aser blueprint December 2023 nung www.nbsenl.edu.in nung upload süa lir.

School tekolakpurtem aser tesayurtemi NBSE portal nungi kaketshirtem len anitsü atema designs aser blueprint reprangtsü nenshir ta NBSE-isa metetdaksü. PERMITTED ITEMS

(a) Admit Card in original, School Identity Card
(b) Stationery item i.e.

Transparent Pouch, Geometry/Pencil Box, Blue/Royal Blue Ball Point/Gel Pen, Scale, Writing Board, Eraser, Analogue Watch and Transparent Water Bottles.

(c) Bus card
BARRED ITEMS

(a) Any stationery item - such as textual material (printed or written), bits of papers, Calculator, Pen Drives, Electronics Pen/Scanner, etc.
(b) Any communication device - such as Mobile Phone, Bluetooth, Earphones, Microphone, Pager, Health Band, Camera, etc.

(c) Items like Wallet, Goggles, Handbags, Pouches, etc.

(d) Any eatable item opened or packed, except for diabetic candidates.

(e) Any other item which could be used for unfair means.

Patkai Christian College nung hon jubilee jeli sentong agi



Rev. Dr. Tuisem Shishak, founder aser Principal Emeritus (tejaklen nokdaka aliba abelen nungi asembuba) den taoba mapang aser tang teinyakdak principal tem, alumni aser dangartemi Honibarnü Patkai College hon jubilee mung nungtem nung süngtong atem dang tangokba noksa nung angur.

Dimapur, Aenjeti/January 20 (TYO): Patkai Christian College (Autonomous) nung January 20, 2024, Honibarnü hon jubilee asoshi jeli sentong ka ayongzüka liasü.

Iba college ya 1974 nung tenzik aser 2024 ya jubilee küm lir aser hon jubilee nung shilem ka ama küm piyong sentong balala agiyonga aotsü lir.

Honibar nikongdang alumni, kaketshir, tesayur aser ketdangsürtem Patkai indang Bundrock Chapel nung adenshia iba sentong ya agia liasü.

Founder aser Principal Emeritus, Rev. Dr. Tuisem A. Shishak-i iba benjongmung nung shilem agitetba atema tepela lemsatepa liasü. Paisa pa kinungsü asür Margaret Shishak bilemteta akum agütsü, shiba 2022 küm May ita asü.

La iba hon jubilee among asoshi asenok den takum meliaka pai peria inyaker anisüngzük nungdaker ta Tsüngremi bilema alitsü südi, ta ashi. "Ni tesüiba mapang aser music department reprangdangra, adangji nung lai la mapa inyako. Lai iba dak tali meinyaktetsü liasü," ta Rev. Dr. Tuisem-i ashi.

Ajisüaka arishi küm 92 tain Rev. Shishak-i pa mapa ano meinyakma lir ta ashi.

Ni yangi kü nuk agi ngua theology school ka amenokner, ta pai ashi aser alumni tem dang Patkai nung School of Theology amenokba nung yaritsü ayongzüka liasü.

"Nenol alumni tem, ni nenok dak teimla lir. Asenok School of Theology alitsüla," ta pai ashi.

Arogo aser lokti anitsü

atema asenoki lenirtem yangera Khristan lenirtem adokdaksünüra theology aser philosophy ya curriculum nung tongtipang shilem kumdaktsüsüla, ta pai nenshia ashi.

Iba sentong nung music students batch mezüngbuba (1991-1992), Joey Woch (batch of 2000), Bethel Tsuzü (PU Music 1999) nungertemi yimya balala nung ken agi shilem agia liasü.

Nagaland Conservatory of Music-ia temeja ken ka aten, kong NCM amenoksang aser chairman, Lipokmar Tzudir (alumnus, batch of 2000) ajanga choir ania liasü.

Maneni Patkai Drama Club ajanga Rev. Shishak takum otsü indang saya ka agi shilem agia liasü.

Dimapur nung Camp Mode Registration-cum-Awareness sentong agi



Dimapur, Aenjeti/January 20 (TYO): Pradhan Mantri Vishwakarma (PMV) Scheme atema Camp Mode Registration-cum-Awareness sentong ka January 19 & 20, 2024 anogotem Dimapur nung agia liasü.

Iba sentong ya MSME-DFO, Dimapur ajanga Department of Industries and Commerce, Government of Nagaland aser Business Association of Nagas (BAN) den teka amteper Senden Riju, Purana Bazaar, Dimapur nung ayongzüka liasü.

PM Vishwakarma Scheme ya August 15, 2023 nü sangdong aser September 17, 2023 nü Ato Kilonser Narendra Modi-i semzükja liasü.

Iba scheme nukjodong ya unorganized sector nung traditional artisans aser craftspeople tem yaritsü atema lir.

Iba Scheme ya Village Councils/Panchayati Raj aser ULBs ajanga mapa kuma inyaksü aser grassroots level workers tashi ajangzüksü.

Iba Scheme yagi Vishwakarmas dak sendakba trades 18 nung kongshiba artisans aser craftspeople tem awajemtsü.

Iba Scheme ajanga artisans aser craftspeople tem recognition anguba den stipend agüja skill up-gradation, osetsüsset aliba nung teyari, collateral free credit, digital transactions atema teyari aser marketing support alitsü.

Anogo ana atema iba camp ya Union Minister MSME, Narayan Rane-i virtual yimya nung semzükja liasü.

Iba sentong nung Union Minister ajanga virtual yimya nung Kiphire nung aliba Nagaland Tools and Training Centre Extension centre aser Wooden Furniture Cluster, Toluvi Industrial Park, Dimapur nung Common Facility Centre semzükja liasü.

Kasa sentong nung Union Minister ajangasa virtual yimya nung Razaphe Basa, Chümoukedima Technology Centre on Medicinal & Aromatic plant atema

nüngshilong azüngja liasü. Vishwakarmas takum jenjang tajungba kuma ajungkettsü nukjidong nung Central sorkari iba scheme aser MSMEs indang sentong balala ajanga yanglua rongsenketzüng tsütsü aintsü asoshi maongka tasen agütsür, ta Union Minister-i ashi.

Secretary MSME, S. L. Das, IAS ajanga tayongzükba o jembi aser Ashutosh Niranjana, IAS, Director PMVK, Ministry of MSME ajanga iba scheme indang tzüzüng-ozüng tem metetdaksü aser Mercy Epao, Jt. Secy Ministry of MSME ajanga melepzüng o jembia liasü.

Iba sentong nung shisalen sayurtem ya Financial Institutions, RBI Kohima, Common Service Centre, NSDC, Employment Skill Development and Entrepreneurship nungi arua liasü.

Iba Camp tenzüker mezüng anogo nisung 291 aser tananü nisung 150 dena liasü.

Common Scholarship Portal

kübok online submission atsülanger **Dimapur, Aenjeti/January 20 (TYO):** Directorate of Health & Family Welfare

ajanga kaketshir aser kaket reju ajunga dang sangdong ka nung ashiba agi, Health & Family Welfare indang Common Scholarship Portal

kübok online submission anogo January 31, 2024 tashi atsülangogo.

Aser iba scholarship atema form ya URL <https://Scholarship.nagaland.gov.in> nung agütsütetsü, ta sangdong ajangasa ashi.

DHEW Longleng ajanga BBBP campaign ayongzüksü

Dimapur, Aenjeti/January 20 (TYO): National Girl Child Day nungtem nung District Administration and District Hub for Empowerment of Women (DHEW) Longleng ajanga January 21 nungi January 26, 2024 tashi Beti Bachao Beti Padhao (BBBP) campaign ayongzüksü, ta sangdong ka ajanga ashi.

Iba nungtem nung Longleng Town nung January 22, 2024 nü Marathon Race ka

ayongzüksü. Anungji ward president (Youth) tem dang pei ward nungi arishi küm 14-18 tsüngta tetsür pongu-ngu yoka iba sentong nung shilem agidaktsüsü ayongzüker, ta sangdong ajanga ashi.

Iba sentong dak sendakba osangtsüsang tali tejangjaba metetsü asoshi mobile number 6009984157 nung tongteprateptsü akok, ta sangdong ajangasa ashi.

ABAM-i Mokokchung nung mozüki tem semdang



Dimapur, Aenjeti/January 20 (TYO): ABAM ajanga January 20, 2024 nü Mokokchung jila kübok aliba mozüki pezü - Woodland Nursing Home, Lenjem Hospital, IMDH aser ANAVA Hospital/Foundation semdanga Tsüngrem temoatsü aser teyari meshia sarasadem mapang agia liasü.

Meimchirtem asünung alima nung temang nung timtem balala ajangshia aor, iba mapang shi nung taneptsü bushia mozüki balalai aor. Tsüngremi agütsüba sempet balala ajanga doctor temi anir mozüki nung inyakertem ajaki tajungtiba nung anepalua jenti taneptsü ngudaktsüba asoshi pelaba

lemsatep, ta Executive Secretary, ABAM, Rev. Dr. Mar Pongener ajanga sangdong ka nung ashi.

Maneni shi taküm nung taneptsü anguba den tanela jenjang kümzüka alitsü tangatetba nung ABAM ajanga mozüki arurtem den Tsüngrem maongka lidakjang ta sarasadema liasü.

Tanela anitsü asoshi ABAM-i mozüki nung ayutsü atema SQC nungtem Laishiba adokba agüja sarasadem agia temoatsü ngugo. Tsüngremi mozüki nung inyakertem aser taneptsü bushia arurtem ajak moajang ta sarasademtsür, ta sangdong ajangasa ashi.

DC Kohima-i 75 buba Republic Day nung HoOs ajak adentsü metetdaksü

Dimapur, Aenjeti/January 20 (TYO): Deputy Commissioner Kohima, Kumar Ramnikant, IAS ajanga sangdong ka nung Kohima District nung aliba Head of Offices ajunga dang January 26, 2024 nü Nagaland Civil Secretariat Plaza nung agitsü aliba 75 buba Republic Day nung adentsü aser pei-pe staff tema arua shilem

agidaktsüsü metetdaksü. Head of Offices tem dang maneni iba anogomung sentong nung adenba attendance report Additional Deputy Commissioner Hq. Kohima nem agütsüsü metetdaksü.

Maneni Plaza telung nung gari anentsü mesümenangba mechi entrance gate alema adoker gari anena ayutsü ashi.



Jharkhand Mukti Morcha (JMM) züngsemtem Ranchi nung chief minister Hemant Soren'er kima adenshiba noksa nung angur. Enforcement Directorate (ED) ketdangsütemi Honibarnü Soren dang ochi mashi ken o ka nung ken o ashishitsü atema par ki semdanga liasü.

Centre-i Myanmar den arrtsü atsübangtsü: Amit Shah

New Delhi, Aenjeti/January 20 (Agencies): Union Home Minister Amit Shah-i, Myanmar nungi nüburttem India-i sadem sadema aitba nokdaksü atema Arrtsü nung atsü atsütsü, ta ashi. Myanmar nung telungpurtem aser military sorkar na tsüngda mangatettep adoker aliba ajanga Myanmar nung sepaitem aika India-i jena aitba mapang Hom Minister-i iba olen lemsatopogo. "Bangladesh den ama Myanmar den India arrtsü ya kümzüka ayutsü," ta Amit Shah-i, Assam Police commandos passing out parade sentong nung ashi. Taoba ita asem tsüngda Myanmar nung sepai 600 shi

India-i jena aitogo. Parnok Mizoram kübok Lawngtlai district nung jenoka liasü. Myanmar anütoklen aliba Rakhine state nung amenoka aliba Arakan Army (AA)-i Myanmar military camp tem maktokba sülen sepaitem ya Mizoram-i jena aita liasü. Arrtsü nung atsü atsüba ajanga India-i linük ana tsüngda Free Movement Regime (FMR) agintsü. FMR aginba sülen arrtsü nung aliba nüburttem kidanger linüki aitsü atema visa nüngdaksü. FMR ya 1970s nung benoka liasü, kechiyong India aser Myanmar arrtsü nung alirtem ya arrtsü adener kinungertem aser linük balala süaka kin kasa

dang liasü. Honibarnü Mizoram sorkari Centre dang kidanger linük nungi sepaitem ya takaratiba nung meyipa yoktsü mepeshia liasü. Myanmar nung telungpurtem aser military-i aniba sorkar tsüngda raratepba mapang Myanmar nung sepai noklang aika India-i jena aitar. 2021 küm sorkar atsüngtokba sülen Myanmar nung general tem tang kanga tendangba mapang ka lir, kechiyong taoba küm October tetemlen nungi telungpur telok balala longjemer jilattem maka atsüngba den military post balala maka arudar aser iba ajanga sepaitem jenshia aotsüsa kümogo.

Rajasthan CM lenisüba nung lepa reprangshiba senden amen

New Delhi, Aenjeti/January 20 (Agencies): Rajasthan sorkari Honibarnü ashiba agi, France tir Emmanuel Macron-i January 25 nü Jaipur semdangtsü aser pa agizüktsü atema renemshi tezükogo. Official sangdong ka ajanga ashiba agi, Macron-i Jaipur semdangtsü aliba dak sendakba nung Chief Minister Bhajanlal Sharma lenisüba nung Hokolbarnü high-level lepa reprangshiba senden ka ayongzüka menogo. January 26 nü Delhi kübok Kartavya Path nung Republic Day amungba mapang Macron ya tongti tejaoker asütsü. Chief minister-i ashiba agi, France tir agizüktsü atema

terenemshiba mapang shidak nung tembangtsü aser pai ketdangsürtem dang Macron tanendak, security aser senzüsenpongtsü atema jenjang tapet agitsü asoshi tetuyuba agütsüogo. Kasa sangdong ajanga Sharma-i ashiba agi, Rajasthan indang art aser sobaliba dak sendakba nung hoardings balala state kübok tesem balala nung amenoka toktsütsü. Chief Secretary Sudhansh Pant, Director General of Police U R Sahoo, Additional Chief Secretary, Home, Anand Kumar aser tanga ketdangsür tejentemi iba senden nung shilem agia liasü.



New Delhi nung Reublic day parade atema India Army Sikh Regiment sepaitem training agiba noksa nung angur.

Sorkari media, social media sabangtem dang osang teyazü meproksü mepeshi

New Delhi, Aenjeti/January 20 (Agencies): India sorkari media outlets aser social media sabang balala dang Ram Temple sentong dak sendakba nung osang teyazü mesüra rongrong adokdaksütsü ana nung aliba osangtem meproksütsü metetdaksüogo. Ram Temple ya January 22 nü kanga meraketa lapoktsü asoshi renemtepdar. Tentinü matong tsüngda December 16 nü nungi tenzüka külem keja balala agiyonga arudar. Tekülemdak lapokba sentong magi tsüngda VIP tickets, Ram Temple Prasad agütsüba amala osang teyazü social media nung prokshidar.

Information and broadcasting ministry-i sangdong ka ajanga ashiba agi, "mejangjaba aser osang teyazü balala prokshidar aser talisa social media nung prokshidar, iba ajanga kin o kin tsüngda tesunep nung aliba minprongtü aser lokti nung mepetmesü adoktsü akok." "Maneni parnok tinyaktsü ama social media sabangtem dang temalen shisema aliba osangtem mesayutsü mesüra meproksütsü atema takokba tashi inyaktsü metetdaksü." E-commerce site Amazon dang Hokolbarnü Central Consumer Protection Authority-

i, 'Shri Ram Mandir Ayodhya Prashad' list agintsü atema tetuyuba agütsüogo. Amazon-i ashiba agi, parnok indang policy tem dak ajemdaker parnoki iba amala listing tem anema jenjang tapet agidar. Anogo ishika tejakdang QR code taila ka den WhatsApp osang ka ayimsünga prokshio. Iba osang nung pran-pratishtha sentong atema meshili VIP ticket agütsütsü tenangzüka agüja liasü. Temple Trust-i ken o jangjashitsüogo aser pran-pratishtha sentong ya tejaokertem atema dang lir aser teshimtet nisung kar nem dang Trust-i shiti agütsüogo, ta ashi.

Bengal BJP tekolakbai Jan 22 nü soti agütsütsü mepeshi

New Delhi, Aenjeti/January 20 (Agencies): West Bengal BJP tekolakba Sukanta Majumdar-i Hokolbarnü, January 22 nü soti agütsütsü mepeshia Chief Minister Mamata Banerjee dangi shiti ka zülüogo. Pai ashiba agi, aji ta asünungdang Ayodhya nung Ram temple semzüka anogo state nung aliba nüburttem benjungtettsü. Centre sorkari linük ajanga nung government establishments, public sector banks, insurance companies, financial institutions aser regional rural banks (RRBs) tem ajak January 22 nü anogo tom tashi soti agütsüogo. Iba den kidanger Assam aser Odisha-ia anogo tesadang ka atem soti agütsüogo. "Ni CM @MamataOfficial (Mamata Banerjee) dang January 22 nü school ajunga soti agütsütsü atema mepeshia asüngdangogo, ajita asünungdang West Bengal nung aliba lanurtemi Ram Mandir mungtettsü," ta Majumdar-i ashi. Shiti nung pai ashiba agi, chief minister-i taoba mapanga tongtibang sentong agiba

mapang soti agütsüogo. "Anungji Ram Temple semzüka anogo state nung aliba nüburttem benjung nung shilem agitsü atema temelaba agütsütsüla ta bilemer. Anungji onoki iba anogo soti ama officially sangdongtsü mepeshir," ta pai ashi. Majumdar indang shiti dak sendakba nung TMC lenirtemi, Hindu almanac nung Ram Temple semzüksüba anogo indang kecha shia ali mali iba indang ashishia liasü. "Almanac mesüra tanga Hindu tamangba yimsü calendar nung Ram Temple semzüka anogo indang shisema ali mali? Sukanta Majumdar putir ka kümer asü? sentong nung BJP lenirtem aikati shilem agitsü lir aser iba ya Lok Sabha election matong tsüngda political sentong ka asütsü. BJP ama masü onokiba tamangba yimsü aser yimden yimsüsüba na memeyokteper," ta TMC otongdar Kunal Ghosh-i ashi. January 22 nü CM Banerjee lenisüba nung south Kolkata nung Hazra Crossing nungi Park Circus tashi 'rally for harmony' ka ayongzüka agitsü lir. Rally sülen lokti sendena ka agitsü.



Defence Minister Rajnath Singh-i New Delhi kübok Delhi Cantt. nung NCC Republic Day parade 2024 camp semdangba mapang NCC cadet temi shilem agiba noksa nung angur.



TIR YIMYIM YIMOBILEM (EDITORIAL)

DIMAPUR

AMUNGNÜ

AENJETI 21, 2023

Kechiba asenoki mamangteter ?

Nisung taküm ka asoshi tashidak tulutiba aser tamajungtibaji tetsübu ya asütsü. Atangji, alima nung kecha metsüburbo shinga malitsü. Kari nibo kecha metsübur ta ashitsüa akok saka pa mesüra la jagi tasütsübo tsübu bilema alitsüa akok. Aji oda, asenok ajaki shirangtsü tsübur aser tamakok angutsüa tsübur. Alima agi ojang asünungji, tanübo cancer tashidak ya yimra manga agi atong amai kümogo. Ajisüaka, asenoki cancer tsübur masü saka tasütsü tsübur, anungji asenok aika cancer agi masü tetsübu agi timatemer. Iba ama tetsübu tashidak nungi aneptsü aser kümzüktsü asoshi Lashiba nung mozü ka zülüja lir, aji Yisui akoktsü ta amangba tamang. Kenü anogo Yisu nütsüngtem Yisu den külemi tzüym ka ajanga rong ka nung ooya alidang yipru tuluka ait aser tzüsem agi rongji tzüym telongi alutsüsa tzü agi mubanga aküm. Anungji, Yisu nütsüngtemji tetsübu agi asüng saka Yisubo mejanga liasü ta Mathi tapu 8 nung shia angur. Iba tensa mapangji kodang bilemdangdir, nütsüngtemji Yisu den liasü saka tsübu kechiyong parnok dak tzüym yipruji anendaktsütsü tashi mali asü. Ibaji asenok arogo purbo arogo nunger aser tamangerbo tamanger rogotem saka Yisu dak jungjunga mamangtetba purtem amai lir. Asenoki Yisu dak amangra asenoki Yisu tenüng nung temenen tanelatem madak, tzüym yipru madak aser tashidak aser tetsübu madak takok angutsü. Ashiko, parnok rong ka nung külemi ooya alidang Yisu mejanga oadoker lia tzüym yipru aitbaji Yisui nütsüngtem dak aketba tamang, tashi aser ain tendangba mapang ka asütsüa akok. Yisu parnok den temang dena taküm ali tashi nütsüngtemi Yisui agütsüba ain tashi amshitsü mapang aser maongka mengui liasü südi, anungji iba anogo ya nütsüngtemi parnoksa parnok dak aliba tamang agi mapa küma amshitsüba mapang tajungtibaji liasü. Ajisüaka, parnok dak aketba tashi amshitsü melen parnok tsübu adok. Ashi, Ibri 11:33-35 nung ashi ama, tamang agi dang tamangertemi Tsüngrem tashi tulu amshitet ta shia angutsü. Aji oda, Tsüngrem dak amangba ya mapa inyaktsü training ka agi amai lir, training agir kazütsüba masü saka training nung angazükbaji mapa agi inyaktsüla. Iba jagi asena taküm alitsü aser tangar nema tajangzük agütsütsü. Kasaji, tamangji amanger ayutsüba masü saka tamang agi mapa tulu inyaktsü asoshi amanger. Ibayongji, Yokob-ibo mapa medenra tamangji tasü ta Yakob tapu 2 nung shia aliba angur. Aji kanga shitak lir. Aji oda, Yisui nütsüngtem dang ni temang dena nenok den kopiga alitsü ? Nenoki kü tenüng nung tamang agi temenen tanela maridoktetter no ? Nenoki shirangertem maneptsütetter no ? Nenoki tzüym yiprua manendaktsütetter no ? ta tayongzükba agütsübaji tanü asenok nem agütsür amai asenoki amanga agizükdi. Aji oda, Yisu aser nütsüngtemi ajangshiba tzüym yipruji kodang tanü tensa asen taküm , kibong , yimten, lokti aser arogo den medemdangdir, atangji, asen taküm aser kibong nung anogo shia yipru agi asenok nungshitsüba asenoki mekoki laodagi, yimten yipru nung Yisu dak mamangteti asenok aika samadagi, lokti menendaktsüba yipru agi asenok aika dak kongshio go aser arogo yipru agi asenok arogo nungera masü aser limapurtema masü ta küma ondaktsüdagi. Ibaji asenoki Tsüngrem dak junga mamangtetba ajanga lir. Joko, amangli amangerbo asenoka asen tamang agi asen nokdaktettsüsa aser Yisui agütsüba tashi amshia asen den alirtem nema tetsübu nungi anisüngzük aser tepela agütsütettsüsa asenoki amangtsüla. Atangji, Toma ama asenoki mamangtetba tashimaitjia Yisu dangi bener aotsüla, idangji dang Tsüngremi asenoki Pa dak amangtsüsa asen taküm nung Pa taochi agi mapa inyaktsü.

OLEMSABANG

Tsüngrem mapa nung tenzükba temoatsü aser atakadem

L. Kika Pongener.

(Maneni yashi adok nungi...)

Tasen lai osangtajungtem nungji züngdangra...Yisui ashi, "Shibai pei tebu mesüra tetsü kü dang tali meimdir; pa ni atema tetemsu masü. Aser shibai jabaso mesüra jala kü dang tali meimdir; pa ni atema tetemsu masü" (Mathi-10:37-39). Yisu-i shinubaji, shirnoki Tsüngrem mapa dang nungi, pei kibong, pei kinunger, pei adianu, pei tsürabur tali meimer, mesura parnokji tongtipangba sudaktsür... Parnokji Tsüngrem mapa nung tenzüktsü tetemsu masü ta shinur. Ano Yisu-i shiogo..."Shinga-ia kibur ana medenzüktet; kechiaser pai ka sempatsü aser ka meimtsü, mesüra pai ka dak temulong agutsütsü aser ka mezüngmeshitsü. Nenoki Tsüngrem aser rongsen medenzüktet" (Mathi-6:24). Yisu shinubaji... Shirnoki Tsüngrem'er mapa nung tenzük dang rongsen nung tenük yoker, rongsen nung dang rangloker tenzük, mesura Tsüngrem mapa dang nungi rongsen-ang tongtipangba sudaktsür... Parnokji Tsüngrem tenzüktsü tetemsu masü ta shinur. Ano Yisu-i shiogo..."Nisung chir-i tenzükdaktsütsü masü; saka tenzüktsü aser aika alang pei taküm agutsütsü aru" (Mathi-20:26). Yisui shinubaji...Pa Tsüngrem süaka, tangar nem tenzükdaktsütsü, tangar nem akümstübudaktsütsü, mesura tangar nem salem agüja tushidaktsütsü...Iba atemaji aruba masü, saka pai-ang tenzüktsü aser nungdakra pa taküma dena bendanga agutsütsü atema aru...ta shinur. Anungji Tsüngrem tenzükertemji tulu shisanga, tangar nem salem aguja tushidakja, sadem-sadema, jangradema tenzüktsüba masü...Saka ajemalua tila kümer, timtem, reshikangshi, tatala aser mezüngmeshi ajak aremzüka tenzüktsüba jatet...ta shinur.

Tanü putu nung, asen lima nung mungdang tenzükertem aser lim arogotem nung tenzükertem, libaliro aser tenzükba jenjang reprangdangra... Mungdang aser arogo teimba ka nung itasen tulu agutsür, Gratuity yutsür, Ki tajung nung lidaktsür, Gari agutsür, tatsüktsü süng agutsür, news paper bill, mobile bill, light bill, tzü bill yamala ajak agutsür, benjong-bentsü nung senpet agutsür, aser shirangshiko mapang teyari agutsür. Arogo tulu-takar arogo nung tenzükertem balaka...'Facilities' teperi agutsür. Anungji, iba ama jenjang tajung nung tenzüktsü maongka anguba atema, Tsüngrem tenungsanga, kanga pelaseter... Tsüngrem mulong achitsüsa aser arogopurtem temulong achitsüsa, ajemalua tila kümer bendanga aguja tenzüktsüla. Ajisüaka, tesasatsüka, tanü lim arogotem nung Tsüngrem tenzükertem karibo küm nungi küm songtema pei santem ki mongudangba, pei santem rongnung shibaji shiba (?)...aji mejangjaba karbo lir. Tsüngrem lar/tenzükter aikati takar-tulur 'VVIP'-tem ki dang angu ashi, tilar aser sensaker ki-bo kodanga mongudangba Tsüngrem tenzükter karbo lir.

Jila arogo ka nung Tsüngrem tenzükter ka, pei arogo nung züngsem tajung ka asüba Funeral Service nung adentsü aorba, ki mangu/lenmang memeteti nemzüa senzüa lia, arogopur kari anir oa anioktsüba, otsü jembiba angazük...!!! Aji oda, Tsüngrem tenzükter aika takar-tulur dak dang tenük yokba, sentsü-keter dak dang rangloker tenzükba, pei ajangzüktsü dang bushiba aser jenjang tajung 'High level & Standard' nung dang linuba Tsüngrem lar karbo lir... Aji oda, Tsüngrem tsüngdang sentsüh aser khuret masütsüsa tenzüktsüla.

Ano tesasatsüka, Tsüngrem lar karbo, libaliro, jaklaliro, jembishinu yimya agi Tsüngrem tenzükter memesuk, pa/la libaliro, jaklaliro aser jembishinu yimya nung arogopur aika metsüdaktaktsüba aser temulong yirudaktsüba karbo lir. Jila tulu ka nung, arogo tulu ka nung 'Sannuker' kati, kibong ka nung Funeral Service agidang, jabaso tajung sua-doker, jashia mangyima alinung...Sannuker jagi Tsüngrem o agi anar, pa langka kar nung jashia aliba tayang küpzükter amai sashi-sashia mit adoka jembiba ngua, iba 'Funeral Service' nung adener aika temulong yirudaktsü...!!! Aji oda, Tsüngrem lar karbo arogo nung masü...Yimden mapa nungang tata-tainer/tazünpur asütsü kanga tapet lir... Ano Tsüngrem lar karbo 'Watsü Telongjem' amala nungang tanishir (Leader) asütsü kanga tapet lir...Tsüngrem lar aika tsüngro-tasang, kanga tesangra, kanga tesashi, kanga tashi-tawa aser ajak nung takotet lir. Tsüngrem oi ashir..."Per ama shisa kaang ; aser Posu ama tongmelang liang" (Mathi-10:16 b). Aji oda, Tsüngrem lar taküm kaji, libaliro, jembishinu, jaklaliro ajak nung aküoka litetba, taremsük akaba, ajemalua tila kümtetba, tesungjem taküm, tulur-tilar, takar-sensaker ajak den küsasa litetba taküm asütsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sudan nung telungpuri tamanger ka tepset, tekülem kidang mi senloktsü

Juba, Aenjeti/January 20 (Agencies): Khartoum nungi southeast tsütsü mile 85 shi pilar paramilitary Rapid Support Forces (RSF) nungi telungpur temi Sudan nung tamanger ka dak züka merenshiba sülen asü, ta osangtem ajanga ashir.

April 15 nungi tenzuka Sudanese Armed Forces (SAF) den raraba RSF nungi züngsem temi December 18 nü Al Jazirah state yimtiba Wad Medani agiba sülen January 1 nü Karbino Bla dak kanga sashia züka merenshiba liasü. Pa dak teka sangshiba nükjiding ya mejangjai lir.

Bla ya Sudan Presbyterian Evangelical Church (SPEC) nung züngsem ka liasü aser pa iba züba ajanga January 5 nü asü, ta yangji alirtemi ashi. Pai kinungtsü aser tena jala kinü ka yutsür asü.

"Ibai Medani nung evangelical arogo asoshi takoksa tulu lir," ta kinunger kati ashi.

December ita iba state agiba sülen RSF temi civilian tem tepseter, tetsürtem dak tashiyim amshia shi nung medemer aser nisung aliba ki aser dokan nungi rakzükraakter, ta rights

organisations aser yangji alirtemi ashir.

January 12 nüa RSF nungi Muslim extremists temi Wad Medani nung aliba tekülem ki ka nung mi senloktsü, ta SPEC pastor densema yangji alirtemi ashi. Iba mi ajanga Laishiba, ken kaket, tongtipang kuli kakettem aser menden rongdoktsü, ta pai ashi.

Sudan nung aliba Khristanpuri parnok dak tali tenük yoker ama tsübor, ta pastor-i ashi.

"RSF nung Muslim nung yimsü akhanga amshirtem lir. Ni parnok karbo Khartoum aser Medani nung ajuruogo, shirnoki ni pastor ta meteta kanga mejungi merenshi."

Open Doors ajanga alima nung Khristanpur alitsü tasaktiba linüktem asadangba 2024 World Watch List nung Sudan ya jenjang 8 buba nung lir, koba taoba küm jenjang 10 nung liasü.

2021 küm October ita mitkar tashi amshia sorkar atsüngdokba sülen RSF aser SAF tsüngta rara arur aser Sudan nung telok anaprongi tesem balala nung yimsü asür, aser parnok tsüngta raraba ajanga Khartoum aser tesem balala nung civilian tem tali

timtemer, kong nisung 12,000 dak tema süogo aser million 5.8 shi pei ki yutsür tesem balala nung jenshia lir.

Iba rara tenzükba sülen Khristanpur aliba tesem nunga amaker.

2019 küm Islamist dictator Omar al-Bashir atsüngdokba sülen küm ana Sudan nung tamangba yimsü temeden tsütsü teimla tajung liasü, saka October 25, 2021 nü mitkar temi sorkar atsüngdokba sülen tamangertem reshikangshiba maneni ajurur.


Küm 30 yimsü süa arur April 2019 nung Bashir atsüngdokba sülen transitional civilian-military sorkari sharia (Islamic law) kar agentet.

Ajüsüaka 2021 küm October 25 nü mitkar temi tashiyim amshia sorkar atsüngdokba sülen Khristanpur mulungjang nung tetsübo aitdaktsü.

US State Department-i 2019 küm Sudan ya Countries of Particular Concern nungi agien aser December 2020 nung Special Watch List nungia agien.

Sudan nung Khristanpur nütsüng yongsük ya million ana, mesüra linük nütsüng yongsük million 43 aliba nungi silem 4.5 shi lir ta asadangteter.

Amazon Prime nung 'House of David' reprangtetsü



Aenjeti/January 20, 2024 (Agencies): Laishiba nung ajemdaker yangluba series ka Amazon Prime Video nung angutsü.

Tan hopta Amazon MGM Studios ajanga tamangba yimsü nung ajemdakba movie studio The Wonder Project den tezüngzüktep ka yangluogo ta sangdong aser Laishiba nung ajemdaker yangluba series tasen House of David ya Prime Video atema meshiogo.

The Wonder Project ya director Jon Erwin (I Can Only Imagine, Jesus Revolution) aser taoba mapang Netflix aser YouTube executive Kelly Merryman Hoogstraten nati tenzükba lir. The Chosen indang creator aser director Dallas Jenkins ya The Wonder Project

indang advisor lir.

House of David ya mapang ka tamaren chuba Saul par asükum nem kokdaktsüba indang lir.

"Putir temi pa melena chuba asütsü san anüker David shimtsü renem. Iba mapang Saul tali ain adok aser David-i temeim, azüdokshi aser okadak yimten pangdak ajangshi. Chuba ana. Chuba yimli ka. Tatem nung rara," ta iba series indang summary nung shia lir.

Erwin ya executive producer ama inyaktsü. Nomadic Pictures, Kingdom Story Company, aser Lionsgate Television ajanga yanglutsü. Kingdom Story yagi I Can Only Imagine aser Jesus Revolution yanglua liasü.

"Onoki Jon, Kelly aser

Dallas ajurudang parnoki The Wonder Project atema par mangdang lemsatepba onoki kanga junga angatet," ta TV for Amazon MGM Studios tekolakba Vernon Sanders-i sangdong ka nung ashi.

"House of David indang mangdang aser otsü ashiba atema onok kanga jangratemer aser alima nung asen Prime Video customers tem den iba otsü lemsateptsü yongya atar."

The Wonder Project yagi tamang katettsüsa otsütem yanglutsü, ta taoba mapang Erwin-i shia liasü.

"Pei asoshi dang bilemba lima ka nung asenok alir, aser asenoki kechi nung amangtsüar metettsü tasak. Aser nai nüngtugu shows aser movie tem reprangra, nai na dangar den tokteper ama angatettsü, aser nai kechi nung amangtsüra metettsü tasak lir. Anungji onoki tanaben tamang katettsüsa content yangluner. Ni aser nisung billion 2.5 atema Khristan yimsü ya takum melenshidaktsüba lir," ta Erwin-i ashi.

"Ya inyaktsü asoshi Amazon-i bendanga agütsüba ngua onok temulung nung kongshi, kong parnoki rongsen nung bendanga agütsür yarir aser nüburtem dang item otsü ashitsü onok dak tamang akar," ta Merryman Hoogstraten-ia ashi.

ANOGO ABEN TSÜNGREM DEN

Tongpang rara mesüra tazüokba?

Kechiaser Kibubai shiba dang meimer pa merenshir aser Pai agizükba techir ajak dak azüker. Ibri 12:6.

Khristan shia jangratemtsü masüba mapatem atalokba ajaki tanelaren tongpang rara ama bilemer. Kodang timtem ka atalokdir, idangjisa iba timtem agientsü aikati Tsüngrem dang asüngdang. Parnok timtem tebilemetsüji Satan mesüra tanelaren kechi prok aji arur (Gal. 6:7) ta agizükdang nunglubo Satani asenok amaker ta agizübaji tali tamarenba lir.

Temeim Tebui arütsübaji Satani merenshir ta aibilena angatettsü akok. Nai tanelaren tesayur ka ama tanur dang mesayura, Tsüngremi parnok temenen nung tsükdaktsütsü akok. Na tenzük nung ochi meshira na melenshitsü asoshi iba nungi adokbaji nai agidaktsütsü akok. Ne mulung masüba temulung süa kümdakjang ta sarasademtsübaji tamashi asütsü. Nai temulung agütsütsü aser ne taküm nung nüngdak temelenshi adokdaktsütsü asoshi Tsüngremi na azüoker. Ne tebilemetsütem Tsüngremi azüokba den sendaktepa melira koda lendong. Tsüngrem azüokba Satan mapa aser tanelaren tongpang rara ka ama agizükra Tsüngremer tazüokbai kodanga meyaritettsü. Nai ajuruba timtem ajakji Tsüngremer tazüokba masü, saka Tsüngremi na azüoker ta Laishibai sayur.

Tsüngremi arütsüba nai mangatetra Tsüngremi ne sarasadem melangzür aser Satan nungi kümzüktsü makoker ta nai tenüng asentsü akok. Saka nai temenen menabayong timtem ajurur ta Tsüngremi ne nem tekümdangtsü agütsür. Ne taküm nung timtem mapang ajurur asü? Ibaji Tsüngrem tazüokba asü? Tsüngrem, shiba temeim nung tabensa lir, Pai tatem nung tajung agütsütsü Pa mulung nung alinung Pai na metongshitsür.

Philippines south tsütsü anentsüh agi tamangertem anenbang

Monkayo, Aenjeti/January

20 (Agencies): Philippines south tsütsü tamangertem sarasademtsü atema ki ka nung adenshia lia anentsüh alua iba ki nung kongshi aser tanur pongu densema Khristanpur ter asü.

Hokulbarnü ketdangsurtemi ashiba agi, tzunglu kanga sashia aruba sülen iba ki telung nung Khristanpur sarasadema lia anentsüh ya alu.

Davao de Oro province kübok hon atoba jila, Monkayo nung alirtemi tenem nung aliba yimtsüng nungi nisung tasübang bushiba manener.

Iba lendong atalokba anasa alirtem dang ainshitsü shiogo, kong tzunglu kanga sashia aruba mechi anentsüh ano alutsü amai lir.

Sorkar indang civil defence office nung regional chief Ednar Dayanghirang-i ashiba agi, iba lendong nung ano nisung ana yiru aser ka kong aliar memetet.

Ano anentsüh alutsü amai aliba mechi khen anena atar maneni bushiba mapang nisung tasübang asem ngutet.

"Parnok ki ka nung sarasadema lia anentsüh agi kongshi... Ibai tesasatsüka lir, saka aji asangsang," ta Dayanghirang-i ashi.

Anogo aika tzunglu kanga sashia aruba mechi lenden len aliba yimtsüngtem nung tzümetsüng adoka Davao de Oro aser danga province asem nungi nisung 36,000 dak tema tesem balala nung jenoka lir, ta civil defence ajanga ashi.

Tesem kar nung Hokulbarnü tzungsang tajungba akum, anungji samar alirtem bushiba maparen nung timtem kangabo mali. Anüng nung mopung talem aser temokong ajurutepba ajanga tzunglu ya aru tenzük. Asetkong agi sünga aliba Philippines nungya küm shia yipru aser typhoon 20 jungnüa arur aser itemji talisa June ita nungi tenzuka meyi mapang arur.

2013 küm Typhoon Haiyan arua nisung 7,300 asü mesüra sama, yimtsüngtem ajunga aoyi kumtsü, rong tem tekong nung pongtet aser nisung million pongu dak tema tesem balala nung prokshitsüsa akum.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Shiruru

(n) tetsüing pezü aketba taküm (animal)
* Asen lima nung arem shiruru mali kümogo.

Shitsüki

(n) Shiruru tapu balala pudena metsüdak (zoo)
* Asen lima nung district shia shitsüki tilala ayu nung junger.

OLONG PAITEP # 6673

1	2	3	4	5	6
7					
			8		
			9		
10	11				12
13		14		15	
			16		
		17			

TIPIEN

- 1. Ammang tiyong - (7)
- 7. Mejanga onü - (5)
- 8. Maneni / Mezüngdangtet - (5)
- 10. Sorkar anema noktakerem - (11)
- 13. Mangdang / Tebilemba - (5)
- 16. Bod _ _ _ _ _ - (5)
- 17. Süng rangsar ayuba - (7)

LANGTSÜNGLEN

- 2. Idakji - (6)
- 3. Tetsür tanur dang ajaba - (4)
- 4. Teinyaktsü - (4)
- 5. Hopta nung mezüing nü - (6)
- 6. Aiwa-asangwa - (5)
- 9. Jenjang aketba yin ka - (3)
- 10. Tali tabung - (5)
- 11. Atsütep - (6)
- 12. Songjen - (6)
- 14. T _ _ _ _ hir - (4)
- 15. Iba mapang - (4)

OLONG PAITEP # 6672 TELANGZÜBA

TIPIEN:

- 2. Anükalem, 5. Mesak, 6. Apet,
- 10. Meimtep, 12. Posü, 13. Tajak,
- 14. Tekettsü.

LANGTSÜNGLEN:

- 1. Semdang, 2. Ayak, 3. Leptep,
- 4. Mat, 7. Nati, 8. Yiar, 9. Sangken,
- 10. Metsük, 11. Mazü, 12. Put.

NAI-A YA METETTER MA



Alima nung taküm aliba meimchirtem rongnungi teni talangtiba otsüji tang tashi nung Turkey nung tenüing agi Mehmet Ozyurek-i yangluteta lir. Pa teniji tazüing nungi talak tashi nung 8.8 cm (inch 3.46) lir. 2010 küm Italy lima Rome yimti nung 'Lo Show dei Record TV show' sentong alidang Mehmet indang tenji asadanga liasü.

Assam police nung commando 2,551 aniokogo: CM Himanta Sarma



Guwahati, January 20, 2024 (Agencies): Assam Police nung highly-trained commandos 2,551 tashi mapa nung aniokogo ta Chief Minister Himanta Biswa Sarma-i ashi.

Assam state sorkari security measures akangshitsü meranger ta Chief Minister Sarma-isa ashi. Indian Army aser Assam Police lenisüba kübok commando tem training

agiogo. Parnok shimokba maparen ya tashishitsü melii inyakogo ta CM Sarma-isa ashi. Tanü Chief Minister Himanta Biswa Sarma aser Union Home Minister Amit Shah nati Sashastra Seema Bal (SSB) tenteter küm 60 ajungba benjungmong nung aden. Iba benjung nung SSB-i

Bhutan aser Nepal nung Himalayan arrtsü anükba den

internal security nung shilem agiba ajiteta among.

"Sashastra Seema Bal-i Bhutan aser Nepal nung asen Himalayan frontiers antikba den internal security nung shilem tajung agir. Union Home Minister Shri Amit Shah den külemi ni SSB küm 60 buba benjungmong nung denogo" ta CM Himanta Biswa Sarma-i metetdaksü.

CoTU-i Kuki-Zo nunger alidak sepai talila meshir

Imphal, January 20, 2024 (Agencies): Kangpokpi nung Kuki-Zo nunger telok Committee on Tribal Unity, Sadar Hills (CoTU) ajanga Centre sorkar dang parnok aliba tesemtem nung security forces talila lezmüksütsü ayongzükogo.

Mejangjaba nisung kari Kuki-Zo Maphou dam yimtsüing amakba aser ki rongdoktsüba sülen CoTU-i iba temepishiba agütsü.

January 18 nikongdang

Kuki-Zo nunger ki kar amak aser mi agi rongdoktsü. Maphou Dam yimtsüing ya asür Paotinsat Guite'er yimtsüing lir.

Pa dang Sasat Guite taa ajar aser BSF 59th Battalion nung Sub-Inspector inyaka lia Jammu nung linük atema raradang taküm bendanga agütsü.

Sub-Inspector Sasat Guite-i kümzükba nisungtemi Maphou yimtsüing nung ki rongdoktsüogo. Lendenlen aliba media outlets kari osang tai prokshiba aitsür aser ibala

osang prokshiba ya Kuki-Zo nunger tai tongloktsür, ta CoTU-i ashi.

CoTU-i Centre sorkar dang security forces talila lezmüksütsü aser talisa Phailengmol amala tesemtem nung sepai talila nüngdaker.

Union Home Minister-i security maintenance tetuyuba agütsüba ama Kuki-Zo nunger tesemtem nung central security forces mapa lezmüksütsü nüngdaker, ta CoTU-isa metetdaksü.

Rahul'er Nyay Yatra mapang Arunachal BJP lennirtemi 'Jai Shri Ram' ayimten

Itanagar, January 20, 2024 (Agencies): Arunachal Pradesh nung BJP lennirtemi 'Jai Shri Ram' ayimtena Ram Mandir Pratishta atema diyas 10800 lema agütsü aser iba ya Congress lennir Rahul Gandhi-i state semdangba den külemi agiogo.

BJP lennir Tadar Niglar-i Rahul Gandhi'er Nyay Yatra aitsü. "Iba ya Anyay Yatra lir aser sensotem tsüingda ratatep adokdaksür" ta Tadar Niglar-i ashi.

Arunachal Pradesh nung

küm 9 tashi BJP sorkari yimsü süa arudang airports, railways, highways yangluogo aser medical college ka lapokogo. Congress party-i Arunachal Pradesh aser Northeast nung küm 70 yimsü asüidang senzüka yutsü, ta Niglar-isa ashi.

"Sensotemi terenlok indang tajangzükba anguba mapang Rahul Gandhi-i 'Nyaya' olen tim mesüi amshir kechiyong temeten agütsüogo. Nyay Yatra ajanga tai maketba sensotem ratadaksür" ta paisa ashi.

Taoba MLA Kipa Babu-i

tenzükba Diya Vitaran Abhiyan Samaroh ya sensotem ajak putepa alitsü nükjidong nung lir. Iba mapa ya NGO Sadhbaav Arunachal ajanga inyaker.

1992 Ayodhya mangatettep mapang Kipa Babu ya Northeast nungi Karsewak ka liasü. Iba mapang pa Uttar Pradesh tepuokdak ayu.

Iba sentong kübok Itanagar Capital Region nung diyas 10800 alemtsü aser iba ya Pran Pratishta amongtsü anogo ka jakdang inyaktsü.



Arunachal Pradesh kübok Namsai nungi chief monk-i January 22 nü Ayodhya nung Ram Temple meshitetba sentong nung adentsü. Kongmukham (Golden Pagoda) nung aliba Chongkham-Wakro Mandal nung Swachh Teerth Campaign nung jembidang Arunachal Pradesh Deputy Chief Minister Chowna Mein-i iba osang metetdaksü. Ram Temple meshitetba sentong nung adentsü ta ashiba Buddhist monk tanabubaji Namsai Buddhist Monastery of Golden Pagoda Namsai Abbot Venerable Aggadhama Thera asütsü.

Israel-i Islamic Revolutionary Guard Corps züngsem 4 tepset



Mobile phone ajanga January 20, 2024 nü tangokba noksa ka nung Damascus, Syria nung nisung aliba ki ka raksar aliba angur. Syria yimtiba, Damascus nung Honibarnü Israel nungeri missile amshia amakdang Iran indang Islamic Revolutionary Guard Corps (IRGC) züngsem pezü asü ta ashir.

Tehran, Aenjeti/January 20 (Agencies):

Iran indang Islamic Revolutionary Guard Corps (IRGC)-i ashiba agi, Israel-i Syria yimtiba Damascus nung nisung aliba ki ka amakba mapang IRGC indang "military advisers" pezü tepsetogo.

Syria indang state media SANA-i ashiba agi, Israel-i Honibarnü Mazzeh kiyong maka liasü aser nisung aliba ki ka dak rangloker bomb pokloksü.

Osang jangja aliba source kati Al Jazeera dang ashiba agi, Israel-i IRGC intelligence unit ka maka liasü aser iba mapang Syria nung IRGC intelligence ketdangsür tejen ka aser pa indang assistant iba kidang liasü.

IRGC-i sangdong ka ajanga ashiba agi, Israel-i fighter jets amshia amakba mpang Syria nunger sepaitem aika aser military advisers pezü tepsetogo. IRGC-isa, Israel-i tepsetertem ya Hojjatollah Omidvar, Ali Aghazadeh, Hossein Mohammadi aser Saied Karimi nunger liasü, ta ashi, ajisüaka parnok indang rank bo memetetdaksü.

Iran indang state television-i, iba ya Israel-i kiralongrara inyakyim ka benoka inyakba lir, ta shiogo.

Iba tesem ya missile pezü amshia amaka asütsü ta bilemer aser iba ajanga pezüben tashi

atongtepa tua sür aliba ki ka ajasaja liasü, ta Iran state media-i ashi. Iba lendong nung ano nisung ka yirua mozükidangi anirogo.

Iran temeket nung tensa mejungi küma aoba aser Israel-i Gaza maneni maka nisung 25,000 shi tepseter aliba mapang ka nung Honibarnü iba ya atalokogo.

Israel-i kümtem tsüngda Syria kübok sorkari azüoker aliba tesemtem nung Iran den sendaka aliba tesem aika maka arudar.

"Syria ya parnok temeket nung aliba linüktem aser alima nung tashi tait linük tem tsüngda tashi toktepa tesem ka dang masü saka itangiter dak sendakba nunga linük balala tsüngda raraba tesem ka lir," ta Al Jazeera osangbener Resul Serdar-i ashi.

"Iran, Lebanon aser talisa Hezbollah atema Syria ya 'Axis of the Resistance' atema kanga tongtambang tesem ka lir, aser ibayongji Syria nung parnok inyaksangshi ya meimshia dang ayur," ta pai ashi.

Taoba ita Israel-i anüng ajanga Damascus nung tesem ka amak aser iba mapang Iran nunger general Sayyed Razi Mousavi tepset, shiba Syria nung IRGC adviser mapang talangka inyakogo.

Israel-i Syria nung tesem balala amakba indang aibenbo menanzüki arudar, saka parnoki ashiba agi, parnoki Lebanon nungi Hezbollah ama shirnoki Syria tir Bashar al-Assad-i aniba sepai nem teyari agütsütsü atema sepai meyrejang aika yoker, item amala Iran den sendaktepa aliba teloktem tamendakdak maka arudar.

Iba ita tetenzüklen Lebanon yimtiba Beirut nung Hamas commander Saleh al-Arouri tepset, koba Israel-i asütsü ta bilemer.

Taoba hopta ishika tsüngda Syria nungi Israel aser Israel-i atsünger aliba Golan Heights nung rocket tem khaloktsüogo aser iba ajanga Israel aser Lebanon arrtsü nung tensa mejungi kümogo aser kasa mapang nung Iran den sendaktepa aliba Houthi telokia Temerem tzüyim nung rong balala maka arudar.

Iran-i Hombarnü Iraq indang semi-autonomous Kurdistan region yimtiba Erbil ballistic missiles ka amshia amak. Parnoki ashiba agi, iba tesem nung Israel indang spy headquarter ka amenoker liasü, koba Iraq aser Iraq Kurdish ketdangsürtemi magizüki liasü. Iba tesem amakba mapang nisung pezü tashi tepseta liasü.

US Senator Tim Scott-i Trump yarir, Nikki Haley asoshi takoksa

Concord, Aenjeti/January 20

(Agencies): United States Senator Tim Scott-i tir atema Republican nomination asoshi Donald Trump yaritsü sangdongogo, aser ibai Trump den tokteper tanatiba aser külem South Carolina nungi Nikki Haley asoshi tetsükdaksü ka lir.

2024 tir election nung tokteptsü asoshi Republican telok nungi Tim Scott ya toktepa liasü saka November ita anen, shiba New Hampshire nung Trump den külemi sapang nung nokdak aser taruba hopta iba state nung par party puri vote agütsütsü lia pai Trump yarir ta sangdong.

"America nunger ajak American kibong ka ama ajitetba tir ka asenoki nüngdaker, aser iba yongji ni New Hampshire-i arua taruba United States tir Donald Trump yaritsü sangdonger," ta Scott-i Hokulbarnü Concord nung Trump bhukumertem dang ashi.

Trump-i tir ka ama taxes ajemtsütsü aser America nunger ka kuma lungjemdaksütsü, ta Scott-i ashi.

"Asen linük lungjemdaksüba tir ka asenoki nüngdaker," ta Senate nung Black Republican ka dang alisang Scott-i ashi.

Scott-i taoba UN

ambassador aser South Carolina indang governor Nikki Haley tenüng mamshi, shibai Scott ya 2017 küm Senate nung mezüng shimoka liasü.

Taoba hopta Iowa nung Trump-i kanga junga takok anguba sülen tir atema tokteptsü asoshi teimla mesamai alitsü atema Haley-i Mongulbarnü New Hampshire nung tashi ita shilem agitsü teimla lir.

Hokulbarnü Vermont Governor Phil Scott-i yaritsü sangdonga alila Haley ya New Hampshire nung Trump sülen lir aser Florida Governor Ron DeSantis ya tasembuba jengang nung lir.

New Hampshire nung Trump-i voter tem dang November ita Tir Joe Biden akoktsü maparen nung rangloktettsüsa asoshi Republican telok nungi toktepa tekeraba nung tembangtsü ayongzüka liasü.

"Asenoki züngdangba aika agi takok nguner, anungji ajaki vote agütsütsüla," ta Trump-i ashi.

Trump-i Haley aitsü aser la ya tir inyaksü metemsü ta ashi aser polls nung DeSantis jengang mejungi tajungba akumba ya kü tenük agi anguba pei sasa raksaba tulutiba lir, ta ashi.

China nung school kidang mi adoka kaketshir 13 asü

Beijing, Aenjeti/January 20

(Agencies): Central China nung boarding school ka indang dormitory nung kitsük-kirong lendong adoka kaketshir 13 asü, ta state media ajanga ashir.

Henan province kübok Yanshanpu yimdak Yingcai School nung mi adokba nung kaketshir ka yiru, ta Xinhua news agency ajanga Honibarnü ashi.

Asürtem ya third-grade elementary school students tem lir ta jangjatetogo. Parnok ajak ya class kasa nungi arishi küm toku aser ter tain liasü, ta tesayur kati sorkar meyong Hebei Daily dang ashi.

Firefighter temi kanga kera mi ya remseptet, koba Hokulbar aonung 11:00 ako nung adok aser iba school tekolakba ya pua lir aser ketdangsürtemi mi adokba bushisüngdang.

Yirur alisang ya mozüki nung anir oa anepalu aser tang tajungba lir, ta Xinhua osang ajanga ashi.

School indang dormitory nung aliba window kar raksa ta China National Radio ajanga ashi aser police temi iba tesem lungbanger aliba noksa kar media balala nung prokshia liasü.

Yanshanpu yimtsüng ya Nanyang yimti tezülen lir, aser iba yimti nungya nisung million 10 jungnüa alir.

Iba mi adokba mapang dormitory nung kaketshir 30 shi liasü aser tanungba kaketshirtem kanga junga kumzük. Firefighter nemo sang agütsür ghonda ka majungdang mi ya remsep, ta ashir.

Iba kaketshir reju ya jurila meyong aser lapoker küm ter jungogo, kong anasa aliba yimtsüngtem nungi tila tanurtem arua nursery aser primary nung azünger ta Xinhua ajanga ashi.

Kisü-jensüba ozüng shidak mamshiba ajanga China nung iba ama kitsük-kirong lendong ya teti ajurur.

Taoba küm November ita Luliang City, Shanxi province nung office building ka nung mi tulu adoka nisung 26 asü.

Beijing nung aliba mozüki ka nunga April ita mi adoka nisung 29 asü aser police temi bushisüngdanga aoba sülen asüngdangyatsü atema nisung 12 apu.

July ita China northeast tsütsü school gym indang kilem ka chirepba sülen nisung 11 asü.



External Affairs Minister S. Jaishankar aser Secretary of Foreign Affairs of Philippines Enrique Manalo na Kampala, Uganda nung 19th Summit of Non-Aligned Movement (NAM) nung shilem agitsü lia senden amendang tangokba noksa ka yangi angur.

Steven Gerrard aser Al-Ettifaq na tenangzüktepba yanglushi



Steven Gerrard

Aenjeti/January 20, 2024 (Agencies): Steven Gerrard aser Al-Ettifaq na tenangzüktepba yanglushiago aser pai 2027 küm tashi iba club coach mapa abentsü.

Arishi küm 43 tain Gerrard ya taoba küm July ita küm an atema Al-Ettifaq nung aden ajisiüaka pai aniba team ya tang Pro League table nung tibuba nung lir. Parnok temaba jenjang nung aliba Al-Hilal dang nungi point 28 agi tajemba lir.

Al Ettifaq-i, Jordan

Henderson den tenangzüktepba yanglur aliba tangatettep nung tembangsüba indang osang agütsüba nüsa Gerrard den tenangzüktepba tasen yangluba sangdongogo. England nunger international midfielder Henderson ya Ajax nung oa denogo.

"Iba ya ni aser ozük kibong atema jangrademtsü ka lir aser bendanga agüja meranga inyakba reprangtetba ka ama bilemer," ta taoba England captain Gerrard-i ashi.

"Onoki tetenzük nungi iba ya mapa tulu ka aser tetsükdaktsü aika ajangshitsü ta meteter liasü, saka aika ajangzüktepeto," ta pai ashi.

Gerrard-isa, "ni kü jenjang angateter aser aji results business lir. Ni iba ya züba züba magir. League nung onok koba jenjang nung ali aji ni meteta lir, saka onok tajungba akümtsü ta ni temulung lema bilemer," ta ashi.

Pa iba Saudi Pro League club nung 2023 küm July ita aden, ajisiüaka parnoki junga masayateti arudar aser Al Ettifaq pur taoba asaya ti tashi khen danga takok monguteti asaya arudar.

Brehostibarnü arishi küm 33 tain Henderson Al-Ettifaq toktsür Dutch club Ajax nung denogo.

Gerrard ama Henderson ya Liverpool captain liasü aser pa Saudi nung hopta nung pound 700,000 (\$887,000) aazüka liasü.

Australian Open: Alcaraz last 16-i iogo; Swiatek tsükogo



Carlos Alcaraz

Aenjeti/January 20, 2024 (TYO): Honibarnü Australia Open tebur kija asaya nung Carlos Alcaraz-i China nunger asayar Shang Juncheng koka round of 16 tongtetogo. Iba asaya nung Shang yiruba ajanga asaya tembanga masayatetsüsa aküm.

Arishi küm 20 tain Alcaraz

ya tour-level asaya ka nung tang mezüngbuba pa dang nungi tanobu asayar ka den asayaogo aser pai iba asaya 6-1, 6-1, 1-0 agi koka liasü. Arishi küm 18 tain asayar ya tasembuba set nung 1-0 ta mekoki aliba mapang yirua masayatettüsa aküm. Tena minute 66 asaya liasü.

Honibarnü tetsür kija asaya

nung 12th seed Zheng Qinwen-i külem China tsür Wang Yafan 6-4, 2-6, 7-6 (10/8) agi akokba sülen ashiba agi la China tsür Li Na-i 2024 küm takok anguba ajanga ajungmesor.

Ajisiüaka tetsür kija asaya nung World number one Iga Swiatek tasembuba round nung Czech tsür unseeded asayar Linda Noskova-i tsükdaktsüogo.

Mezüngbuba set akokba sülen Swiatek-i asaya akoktsü ta bilema liasü ajisiüaka Linda-i tanabuba aser tasembuba set koka la round of 16-i iogo.

Iba asaya ya Linda-i 3-6, 6-3, 6-4 agi ghonda anasür minute 20 nung koka liasü.

Taküm Australia Open nung tetsür top 10 asayar asem dang anunga lir.

Noskova, round of 16 nung Ukraine tsür Elina Svitolina mesüra Switzerland tsür Viktorija Golubic den asayatsü.

Wrestling nationals Feb 11 nungi tenzüka asayatsü

Aenjeti/January 20, 2024 (Agencies): Linük nung wrestling asaya achaayangba ad-hoc Committee-i Honibarnü sangdong ka ajanga, National U15 aser U20 Championships February 11 nungi 17 tashi Gwalior nung asayatsü ta metetdaktsüogo.

"Iba asayamung ya Lakshmbai National Institute of Physical Education on Racecourse Road, LNUPE Campus, Shakti Nagar, Gwalior nung asayatsü. Iba tetoktepba nung linük ajunga nungi wrestler 1200 aser ketdangsür 300 shi-i shilem agitsü," ta Ad-hoc Committee tekolakba Bhupender Singh Bajwa-i Honibarnü osangbenertem den

sensaksemba mapang ashi. India nunger wrestling asaya nung tang tashi toktepba mapang ka lir aser ad-hoc panel aser sorkari suspend sütsür aliba Wrestling Federation of India napronglai National Championships atema sangdongogo.

Wrestling Federation of India-i, 2023 age group Nationals Gonda, UP nung December ita asayatsü sangdonga liasü, ajisiüaka Sports Ministry-i Federation ya December 24 nü suspend sütsü.

Mapang talangka thinena arur election agiba sülen anogo asem dang lir Sports Ministry-i Wrestling Federation of India ya suspend süja liasü.

Kasa mapang nung WFI-i Senior Nationals Pune nung January 29 nü nungi tenzüka asayatsü ta sangdongogo aser ad-hoc panel-ia Senior Nationals ya Jaipur nung February 2 nungi 5 tashi ayongzüka asayatsü ta sangdongogo.

India nung taoba WFI tir Singh anema nüngtugu wrestler temi anir longkak aitba sülen mepetmesü tulu adoka arudar aser election mapang shidak nung magiba atema alima nung iba asaya achaayangba lokti tentet tongtibaia Wrestling Federation of India suspend sütsür lir aser iba ajanga India nunger asayartem neutral ama dang asayamung balala nung toktepa arudar.

KDVA-i Nagaland Olympic Games atema asayar shimogo

Kohima, Aenjeti/January 20 (TYO): Kohima District Volleyball Association (KDVA)-i Hokolbarnü sangdong ka ajanga taruba Nagaland Olympic & Paralympic Games 2024 atema Kohima District tebur Volleyball team nung asayartem shimba sangdongogo.

Asayartem rongnung: Keneivitso Suohumvü, Kethovikho Zenyü, Menuoselie Hojha, Vitsilhoukho Suohumvü, Pfülise Lese, Keneiso Tapa, Vimechozo Thuphre, Neitho-o Shunyü, Medovito Sale, Khevozoto Mera, Adolie Kere aser Kezhasezo Dzüvichü

densema lir. Tebur team coach Neivikhotuo Vielie aser Team Manager-Neichütuo Zhasa asütsü. Tetsür Team Coach-Kenongol Tase aser Team manager-Savilie Kire asütsü.

Tetsür Volleyball Team atema KDVA-i January 22 nü D. Khel Ground, Seikhasou nung open selection trail ka ayongzüka agitsü.

Volleyball asayatsü janrartem ajak dang iba trail nung aru shilem agitsü metetdaktsüogo. Maneni osang tejangjaba agitsü atema item number 9856569364/9615690368 nung tongteprateptsü asoshi KDVA-isa metetdaktsüogo.

Tuensang DC-i Nagaland Olympic trails atema osang agütsü

Dimapur, Aenjeti/January 20 (TYO): Tuensang Deputy Commisioner, Lithrongla Tongpi Rustsa, NCS-i sangdong ka ajanga Nagaland Olympic aser Paralympic Game 2024 (NOPG), koba Februray 12 nungi 17 tashi asayatsü lir, iba asayamung atema Tuensang district nungi asayartem (tetsür aser tebur) shimtsü asoshi

January 22 aser 23 nü St. John Higher Secondary School Ground, Tuensang nung 10:00 ako nungi tenzüka selection trail agitsü ta metetdaktsüogo.

Iba dak sendakba nung osang tejangja agitsü atema item number; 8837348809/9612302331 nung tongteprateptsü asoshi DC-isa metetdaktsüogo.

Raiza Dhillon-i India atema quota 18buba nguogo



Aenjeti/January 20, 2024 (Agencies): Asia Olympic Qualification nung Honibarnü Raiza Dhillon-i tetsür skeet event nung silver medal nua India atema Paris Olympics asoshi quota 18buba nguogo.

Arishi küm 19 tain Dhillon-i asayar trok asayaba final nung kanga junga asaya tenzüka ajisiüaka lai tatemlen target asemen tashi mekhashi-i China tsür Jinmei Gao nem asaya kokdaktsü, shibai shot 60 nungi 56 khashia liasü. Dhillon-i 52 ben khashi.

Gao aser Dhillon napronglai pei linük atema Olympics quota ngutetogo.

Kasa mapang nung India tsürsa Maheshwari Chauhan-i point 43 ngua bronze medal

angu. Maneni India tsürsa Ganemat Sekhon pezübuba nung tembanga liasü.

Asaya tetenzüklen Dhillon-i troben akhaba nungi trobenprongla khashia la temaba jenjang nung liasü aser 14buba tashi la Gao dang nungi point ana agi timba liasü.

Ajisiüaka Dhillon-i anaben tashi mekhashiba sülen Gao tejakdangi atu. Iba sülen ano Dhillon-i khen mekashi aser China tsür la ya India tsür ana dang nungi maneni tejakdang liasü.

Gold medal atema toktepba mapang Dhillon-i ano anaben target nung mekashi aser Gao point asem agi tejakdang kuma lia gold medal angu.

BILEMDANGANG

"Anema alitsü atema kümdanga chiajemang."